

Shasha

Wolemba: **Auspicious Ndamuwa**

Ndemanga: shashaoshashitoni@yahoo.com



Nkhani ya matewera ivuta

Adali ndi chisangalalo chodzadza tsaya chifukwa cha zinthu ziwiri. Chachidziwikire nchoti kudali kuyamba kumene kwa chaka. Ndani sangakondwe pomaliza masiku ankhaninkhani a chaka nkulowa china? Ndi ndani angabise chimwemwe chake pokankhira kuseri kwa chitseko miyezi migolomigolo ya chaka chapitachi?

Chachiwiri ndi choti mkazi wake adali woyembekezera ndipo malingana ndi madotolo padali chitsimikizo chachikulu choti chaka chatsopano chidzanso ndi mphatso m'nyumbamo. "Muyembekezere kuti mwana akhoza kudzabadwa pa Nyuwere kapena pa 2 January 2013," adatero malangizo adotolo wa pa chipatala cha Bwila.

Ndiyetu kudali kujowajowa, inde kuthamangathamanga kuti khandalo likamabwera lidzapeze zinthu zonse ziri tayale. Mayi ake adafika kuchokera ku mudzi kudzadikirira kubwera kwa khandalo. Ndani sabuna kuwonjezera nambala ya zidzukululu? Chimwemwe cha Shasha chidali chodzala tsaya.

Tsonotu chomwe chayambitsa nkhanu yonse ndi zomwe zidachitika pa Nyuwere pomwe Nanjekeya adathamangira naye ku chipatala. Shasha adayitanitsa galimoto ndipo nthawi yomwe amanyamuka pa nyumbapo mpamene padayambira

“Mmaloti moti ndalamazo mundipatse ndikagulire feteleza andimana naye makoponiye! Chizunguchi bwanji kodi?”

mpungwepungwe. Shasha adanyamula phukusi ndipo mayi ake adafuna: “Achimwene, kodi muli chiyani m'menemo?”

“Matewera ndi zinzina zofunika za mwana,” iye adayankha. “Matewera a chaninso achimwene? Chitawuni chanuchi chikupweteketsani ndithu? Inu mwakulira matewera?” Mayi akewo adafuna. Shasha adadzidzimuka ndipo adati, “Amama! Mwati bwa? Mukutanthawuza ku...” Sadamalize mawuwa popeza adamudula pakamwa. “Kodi inu... nchifukwa chiyani mukudzivutitsa? Mmaloti moti ndalamazo mundipatse ndikagulire feteleza andimana naye makoponiye! Chizunguchi bwanji kodi?”

Shasha adaona ngati kutulo ndipo mmene amati adziwadzudzula mayi akewo adamva akupitiriza. “Inu si mwakulira zitenje zomwezi! Ndingong'amba nsalu yangayi ndinkozere mwanayu matewera enieni olimba... uchembere wanga wonse sindidaguleko thewera ine... ana anga nonse 12, palibe yemwe ndidachita chibwana chomuveka tinthu tanu ta ku sitoloti.” Mayiwo

adatsindika.

Nayenso Nanjekeya sadakhulupirire kuti apongozi ake angalankhule mawu otere. Shasha adapukusa mutu. Sadakhulupirire mpang'ono pomwe kuti nakubalayu angawume mtima chotere posafuna kuvomereza kusintha kwa zinthu. “Nanga poti matewera mukukanawo ndidawagula kale pokonzekera tsiku la leroli,” iye adafotokoza.

Koma mayi akewo sadasunthike, “ziribe kanthu zimenezo... ingondipatsani ndikagulitsa kwa oyerekedwa ena ku chipatala tikupitaku... ngati zikalephereke ndikasinthanitsa ndi china chake cha phindu.” Shasha anangoti kukamwa yasa.

Mulungu watikomera mtima ndipo talowa chaka chatsopano. Chebakali akukufunirani chaka chatsopano chabwino awerengi anthu nonse.


Pitirizani kuwerenga tsambali komanso kutumiza mafunso.

Zimatilimbikitsa tikamalandira makalata anu, ndipo tikulonjeza kupitiriza kupanga kafukufuku tisadayankhe mafunso anu kuti muzikhala okhutira ndi mayankho omwe timakupatsani.

Chilimbikitso chathu ndi chakuti pamene talowa m'chakachi tiyeni tiyesetse kukhazikika pa mfundo zabwino zomwe tamanga kuti tikhale moyo wathanzi komanso wopindula.

Ena mwapanga ganizo lochepetsa chakumwa, langizo ndi lakuti pewani kuyenda ndi anthu omwe angakubwezereni ku khalidwe lakale.

Ena mwapanga ganizo loyamba geni m'chakachi powona



CHE Bakali

Vuto limapepuka ukamunong'oneza mnzako. Ngati muli ndi nkhwana, kapena vuto lina liri lonse musazengeleze. Lemberani kalata kwa chebakali Malawi News P/Bag 39 Blantyre

Mafuno abwino a chaka chatsopano

mmene ana amavutikira pakhomo. Limenero ndi ganizo labwino popeza moyo wavuta masiku ano, choncho sinzeru kumangokhalira kudalira mbewu zomwe tidakolera kapena kudalira malipiro akuntchito okha basi.

Ngati mukufuna kuchita bwino palani ubwezi ndi anthu omwe akuchita bwino m'madera omwe inu mukufuna kuchita bwino. Khalani odzichepetsa kwa iwo kuti muphunzire zambiri. Dziwani kuti buku lopatulika ku Miyambo limanena

kuti

“Nzake wa chitsiru amangodziwononga yekha”, sankhani abwenzi othandiza m'chakachi kuti mukhale moyo wopindula.

Chaka chopambana kwa awerengi athu nonse.